

## MUKANDA WA KWIBEDI WA MPETELO

**1** Mpetelo, mutumibwa a Yesu Kidishitu, kwi bapalakane<sup>(1)</sup>, ba ku Ponte, ba ku Ngaletea, ba ku Kapadose, ba mu Ashii na ba mu Bitini, bashaale bwa mafuku apeela [munkatshi mwa beena maumbo], **2** basangudiibwe muyiile kiwukilo kibadiile<sup>(2)</sup> ki'Efile Mukulu Yaya, mu bu-selele bwa Kikudi, bwa kukookyela na kumaaminwa kwa mase a Yesu Kidishitu: Buuntu na kufukama binufimiishwe!

**3** Atumbishiibwe Efile Mukulu, Nshaye na Fumwetu Yesu Kidishitu, aye mwitutandishe dia kabidi muyiile lusa lwaye lukata, bwa lukulupilo alutala ku lusaangukilo lwa Yesu Kidishitu munkatshi mwa bafwe, **4** bwa bupianyini bushi bulombeene kunyanga, bushi na mako, bushakunyatshila, bulamwe mwiulu pa mwanda wenu, **5** [anwe] balamiibwe ku bukome bw'Efile Mukulu ku lukumiino, bwa kipandjilo kitakidi peepi na kuleshiibwa ku kipindji kia nfudiilo; **6** mwinyi mwanusepeela, aku nwibenyongoshwe binobino bwa kapindji kapeela ku bitompwanga bilekeene-lekeene,

---

(1) Pano abaakula bwa beena Yuda babaadi bapalakane munkatshi mwa maumbo abeene, kula na eumbo diabo dia Palestine. Tala mu Yoano 7. 35; na Shake 1. 1. — (2) Sunga'shi: kuwuka kubadiile.

## 1 MPIELE 1

su bino bi mbipwandjikile, **7** bwa'shi kuto-mpiibwa kwa lukumiino lwenu, kubaakidi kwakwa kwa oolo ashimina [kineemo] na atompwa ku kaalo misusa yoso, kwikale kusanganwe [kwiyaluule] mu kusaamuna, na kwalusha ntumbo, na kineemo, mu kwifumbula<sup>(1)</sup> kwa Yesu Kidishitu, **8** wiinyi anudi bafule kifulo, sunga tanwabandjile kumumona; na nukwete kukumiina mwadi, sunga binobino tanukwete kumumona, nukwete kusangala bwa muloo ushii bia kwakulwa na wa ntumbo, **9** pakutambula nfudiilo a lukumiino lwenu, kipandjilo kia anyima [yenu]; **10** kiakia kipandjilo kibaadi batemuki babatemukile pa mwanda wa buuntu bubaadi bwinwabikiishwe abeepusha na kukokoola kalolo, **11** bakimbanga'shi nkipindji kinyi sunga'shi kipindji kii kipaso kinyi kibaadi Kikudi kia Kidishitu kibaadi mwabadi akileesha kwibedi bu-kamonyi bwa makyenga<sup>(2)</sup> abaadi alaminwe Kidishitu na ntumbo yibalondanga; **12** na babebafumbwidiile'shi tabibaadi bwa'bo'bo banabene nya, anka mbwenu, bubaabadi abafubisha ino mianda, itabenuwukisha binobino kwi baaba babenulungwile mukandu wi buwa ku Kikudi-e-selele kitumwe mwiulu, mu yaya mianda bamwikeyilu abadidi kubandjila<sup>(3)</sup> peepi.

---

(1) Sunga'shi: Pa kumwekwa kwa Yesu Kidishitu. — (2) Sunga'shi: Malwa. — (3) Sunga'shi: Kutala peepi.

**13** Ngi bwakinyi, pakwikala baanye mikaba mu bifuka bia mpushiiso<sup>(1)</sup> eenu na pa kwikalala bediingye, kulupilayi kalolo mu buuntu bwabakenutwadila pa kufumbulwa kwa Yesu Kidishitu, — **14** bu baana bakookyele, kushii kulonda ngabiabi yenu ya kala mafuku abaanudi mu kupatamiina kwenu; **15** anka bu bi yawa benwitanyine e selele, anwe namu yikalayi mu mwikeelo wenu selele; **16** mwanda mbifundwe'shi: «Yikalayi selele, mwanda'mi ne selele»<sup>(A)</sup>. **17** Na su anwitanyina [Efile Mukulu mu luteko] bu Yaya, yawa atshibaa kiimu mupuunda mufubo wa muntu na muntu kushii ntoondo, tambukayi na moo munda mwa kipindji kianudi [pano pa nsenga], **18** na bawukye'shi, nubakuudilwe ku mwikeelo wenu wa bisumanga ubaabadi benulambukishe kwi banshenu, kushii ku bintu abinyanga, [bu] fwalanga sunga oolo, **19** anka ku mase a muulo a Kidishitu, bu a mwana a mukooko shi na kilema na shi na kabashi, **20** baadi muwukiibwe kwibedi kubanga kumpala kwa kupangwa kwa nsenga, anka muleshiibwe ku nfudiilo kwa bipungo ku mwanda wenu, **21** anwe abakumiina kukidila kwadi mwi Efile Mukulu bamubushiishe munkatshi mwa bafwe na bamupeele ntumbo, mu kipaso kia'shi lukumiino lwenu na lukulupilo lwenu

---

(A) Lefitike 19. 2. — (1) Nkwamba'shi: Bapwe kulumbuula kinangu kienu kalolo.

biikale mwi Efile Mukulu. **22** Paanwe kusuu-  
la anyima yeenu pa kukookyela kw'eyendo,  
bwa'shi [nwikale na] kifulo kia baana na  
baana kushii bunsesa, efuleneyi kifulo ngofu,  
n'eshimba ditooka, **23** anwe batandjibwe dia  
kabidi, kushii ku lubio alunyangaa anka [ku  
lubio] lushalunyangaa, kwiyi dii na muwa na  
dishadidiile [looso] di'Efile Mukulu: **24** mwa-  
nda «mbidi yoso yi bu lubishi, na ntumbo yayo  
yi bu kilongo kia lubishi: Lubishi lubaumu  
na kilongo ki'alo kibapono, **25** anka eyi dia  
Mwanana adishadidiila looso»<sup>(A)</sup>. Aku namu  
diadia eyi nn'adio dibaadi dinulungulwe.

**2** Biabia pakupela bukyelo booso na bula-  
malama booso, na bunsesa na kiuutu<sup>(1)</sup>  
na twipu twoso, **2** lakilayi ngofu, bu baana  
batooka, mabeele a kinangu ashii asangye  
kingi kintu<sup>(2)</sup>, bwa'shi nukule kwadi'ye mpaa  
na ku kipandjilo, **3** su nubapu kutompa'shi  
mfumu e buwa<sup>(3)</sup>; **4** pa kwiseesela kwadi'ye  
bu kwi ebwe dii na muwa, dibasuumbwilwe  
kwi bantu, anka disangudiibwe na dii na  
muulo kwi Efile Mukulu, **5** anwe banabene  
namu, bu mabwe e na muwa, nwi bebakiibwe  
shibo ya mu kikudi, bu-tshiite bwakwidi bwi  
selele, bwa kulambula milambu ya ku Kikudi,  
yilumbulukye kwi Efile Mukulu kukiila kwi

---

(A) Esaya 40. 6-8. — (1) Sunga'shi: mukao, lukuka. — (2) Nkwamba'shi:  
eyi di'Efile Mukulu dishii disangyesangye ingi mianda yibi. — (3) Tala  
Lono 34. 8.

Yesu Kidishitu. **6** Pa mwanda abasangana mu kifundwe'shi: «Talanga, nantuulu ebwe dikata dia mwipaka mu Siyone, disangudiibwe, dia muulo ukata; na yawa akumiina mwadi takakwatshika buufu nya»<sup>(A)</sup>. **7** Biabia nyi mbwenu'nwe abakumiina, bwadidi na uno muulo; anka bwa baaba bashaabakookyela, «ebwe dibabasuumbwile kwi babaadi abeebaka, adio dibekala<sup>(1)</sup> ebwe dikata dia mwipaka»<sup>(B)</sup>, **8** «n'ebwe dia kikokwesho na lubwebwe lwa kiponeeno»<sup>(C)</sup>, baaba bakwete kukokola kwiyi, pakwikala baashabakookyela, kwiini namu kubaabadi batadikiishwe. **9** Anka'nwe nwi kisaamba<sup>(2)</sup> kisangulwe, bwakwidi bwa mfumu, eumbo di selele<sup>(3)</sup>, mwiilo wabadi bawule; bwa'shi nuwukishe mianda yi buwa ya yawa benwitanyine [kukatuka] ku mufito [nkwenda] kwitaata diaye di buwa; **10** anwe bashibaadi kala bu mwiilo, anka binobino nwi mwiilo w'Efile Mukulu; anwe bashibaadi batambule lusa, anka binobino nubatambula lusa<sup>(4)</sup>.

**11** Bakumiinwe, nenusendeela bu be mu lukilo<sup>(5)</sup> na bu benyi, bwanudia kwilama ku ngabiabi ya mbidi, yaya ayilu ngoshi na anyima, **12** nwikale na ngikashi e buwa

---

(A) Esaya 28. 16. — (B) Lono 118. 22. — (C) Esaya 8. 14. — (1) Sunga'shi: dibaafiki. — (2) Sunga'shi: lubeko, efuko sunga mulongo wa bantu basangulwe. — (3) Tala mu Kikatukilo 19. — (4) Tala mu Osey a 1. 10; 2. 23. — (5) Sunga'shi: bantu be mu lwendo.

## 1 MPETELO 2

munkatshi mwa beena maumbo, bwa'shi mu biabia bintu mwabenwakula bibi bu bantu bakwete kukita bubu, batumbishe Efile Mukulu kwifuku dia kuteembelwa, pa mwanda wa bikitshiino bienu bi buwa biababandjila.

**13** Biabia yikalayi bakookyele ku mfubilo ooso a matalwa a bantu bwa kifulo kia mfumu, sunga biayikala kwi mfumu a eumbo bu e kunundu kwa booso, **14** sunga kwi batoontshi bu kwi baba batumwe n'aye bwa kunyooka abakitshi bubu na bwa kukaanya baaba abakitshi bi buwa; **15** mwanda kikyebe ki'eshimba di'Efile Mukulu kii'shi, paanwe kukita kii buwa nufuungye kukanwa kwa kubulakana kwa bantu bashii na kinangu, **16** bu balungantu<sup>(1)</sup> kushii bu be na bulungantu bu kibwikilo kia bukyelo, anka bu bapika b'Efile Mukulu. **17** Nemekayi bantu booso; fulayi bakwetu booso kifulo; tshinayi Efile Mukulu; nemekayi mfumu a eumbo.

**18** Anwe bafubi ba mu mashibo, yikalayi bakookyele bafumwenu na moo woso, kushii'nka peenda kwi baaba be buwa na bataale, anka namu'nyi kwi baasha suungu; **19** mwanda, nyi mwanda ulombeene kukanyiibwa, su muntu, kwishimba diaye dia munda n'Efile Mukulu, akankameena malwa, pakyengyeshwa kushii mwanda ubi<sup>(2)</sup>. **20** Mwanda a ntumbo kinyi

---

(1) Sunga'shi : bantu beyikeele. — (2) Sunga'shi : akyengyeshwa kushii'ye kukita bubu.

yi kwanka, su, paanwe kukupilwa mpilwa pa kukita bi bubi, anwibikankameena? anka su, panukitshi bi buwa, anufwambuka na'shi anwe anukankamana mwanka, biabia mbi-pwandjikile kupeta ntumbo ku meeso kw'Efile Mukulu, **21** mwanda ku biabia nkwanudi bayitanyinwe , mwanda namu Kidishitu benufwambukiile, enulekyela modele, bwa'shi nulonde biashiino biaye, **22** «aye shii mukite bubi, na shii musanganwe na bulamalama mukanwa mwaye»<sup>(A)</sup>; **23** aye, pababamusabuu-langa, tamwaluule kasaabu, pabaadi akye-nye, tamufune nya, anka bepaanyine kwi [yawa] atshibaa kiimu mu kululama; **24** aye nabene basemwine milwisho yetu mu mbidi mwaye pa mutshi<sup>(1)</sup>, bwa'shi pa kwikala bafwe ku milwisho, twikale na muwa mu kululama; «ku mukambalo kwiinyi nkwanudi bapashii-bwe»<sup>(B)</sup>; **25** Mwanda nubaadi anuwumbakana bu mikooko, anka binobino nubaalushwa kwi mulami [a mikooko] na kwi mukunkushi a anyima yeenu.

**3** Pamunenka namu anwe, bakashi, nwi-kale bakookyele balume beenu'nwe ba-nabene, bwa'shi, sunga kwekala bangi basha-bakookyela eyi [di'Efile Mukulu], bakakiibwe na mwikeelo<sup>(2)</sup> wa bakashi baabo kushii eyi, **2** pakubekyeela bu selele bwa mwikeelo wenu

(A) Esaya 53. 9. — (B) Esaya 53. 5. — (1) Nkwamba'shi: pa nkulusu. —

(2) Sunga'shi: ku ngigashi.

### 1 MPETELO 3

mu kutshiina, — **3** anwe, bashii balombeene kwilumbuula kwenu kwayikala kwa paa-sha akutuungu kwikala na nyene yilukye na kwikala belumbuule na [bikano bia] oolo na bafwale bilamba [bi buwa], **4** anka muntu a muund'eshimba mufwame, mu kuushilwila kwa kikudi kitaale na kifukame kii na muulo ukata kumpala kw'Efile Mukulu; **5** mwanda bino nyi bibaadi abilengyesha namu bakashi ba santu kala, abo babakulupilanga mwi Efile Mukulu, beekale bakookyele balume baabo'bo banabene, **6** bu bibaadi Saala akookyela Abalahama, amwitanyinanga'shi, fumwami<sup>(1)</sup>, kwadi ngi kubanutuukila bu baana, mu kukita kwa bi buwa na kukutwa kwa kutshiina kintu kioso kii moo.

**7** Pamunenka namu anwe, balume [beebakile], bombeelayi n'abo mupuunda kiwukilo bu kwi kipulu kikile kubofula, [ngi kwamba'shi] kikashi, mu kwibanemeka, nwibape kineemo bu beekale namu pamune n'etu bampiani ba buuntu bwa muwa, bwa'shi nteko yenu tayitshibiibwanga.

**8** Nfudiilo a bioso, yikalayi booso mu kinangu kimune, nwikwasheene, bu baana na baana, abesambeena, beeyishe, **9** bashabaalusha bubu ku bubu, sunga kasaabu ku kasaabu, anka abeele mwabi, mwanda nubaadi bayitanyinwe bwa bino, bwa'shi nupiane mwabi;

---

(1) Tala mu Kibangilo 18. 12.



**10** «mwanda yawa akyebe kufula muwa kifulo na kumona mafuku e buwa, alame edimi diaye ku bubu, na milomo yaaye mu kwakula kwa bulamalama; **11** epeengye bubu na akite buwa; akimbe kufukama na elondeene n'ako; **12** mwanda meeso a Mwanana e pe bantu balulame, na matwi aaye [ngatadiile] ku nteko yaabo ya kaseendeleshi; anka mpala ya Mwanana ngishikwe baaba abakitshi bubu»<sup>(A)</sup>. **13** Na nanyi akenukitshiina bubu, su nubaapu kwikala abaambula yawa e buwa? **14** Anka, sunga anufwambuka pa mwanda wa kululama, anwe nwi baasha muloo; «na tanutshii-nanga moo wa'bo, na tanukalakashwanga; **15** anka Mwanana Kidishitu eekala a kishila<sup>(1)</sup> mu mashimba eenu»<sup>(B)</sup>; na yikalayi belumbuule bwa kwaluula, anka na kupopeela na moo, kwi yawa ooso enwipusha kabingilo ka lukulupilo lwi mwanudi, **16** beekale na muntu e munda e buwa, bwa'shi, bitale ku bintu biabenutopeka nabio bu bantu bakwete kukita bubu, baaba abaakula bi bubu pa mwanda wa mwikeelo wenu wi buwa mwi Kidishitu, bakwatshikye buufu. **17** Mwanda mbikile buwa, su kikyebe ki'eshimba di'Efile Mukulu nkikumiine, kukyenga mu kukita kwa buwa, pe mu kukita kwa bubu; **18** mwanda'nyi Kidishitu bakyengyele mususa umune bwa milwisho,

---

(A) Lono 34. 16. — (B) Esaya 8. 12-13. — (1) Sunga'shi: Amuunayi.

[aye] mululame bwa [bantu] bashii balulame, bwadia kwitutwala kwi Efile Mukulu, paaye kwikala mwipayiibwe mu mbidi, anka mupeebwe muwa mu Kikudi, **19** ku kiakia [Kikudi] namu pabayiile, aye nkulungula bikudi [bi] mu lukano [mukandu wi buwa], **20** abio bibaadi bishabikookyela<sup>(1)</sup> ku yingi misusa, pabaadi lwishiinko lw'Efile Mukulu alwindjila mu mafuku a Nowa, pabaadi bwaato abwibakiibwa, mwinyi mubapandjile kasaka kapeela, ka bantu mwaanda mu meema; **21** aku namu kino ki'eyendo akinupaasha binobino, [kwamba'shi] lubatshisho, kushii kukaasha<sup>(2)</sup> kwa mako a pa mbidi, anka kuteka<sup>(3)</sup> kwa muntu a munda e buwa kwi Efile Mukulu, pa lusaangukilo lwa Yesu Kidishitu, **22** [aye] e ku mboko yibalume y'Efile Mukulu (aye pa kwenda mwiulu), bamwikeyilu, na baasha matalwa, na makome mbamukookyele.

**4** Biabia Kidishitu pakwitukyenyela mu mbidi, anwe namu, ikalayi na kiakia kinangu kimune'shi, yawa bafwambukile mu mbidi mmufudiishe mulwisho, **2** kupela kwa kushaala mu kino kipindji kia muwa<sup>(4)</sup> mu mbidi bwa ngabiabi ya bantu, anka bwa kikyebe ki'eshimba di'Efile Mukulu. **3** Mwanda kiakia kibatukitanga mu mbidi,

---

(1) Sunga'shi: bibaadi na kibengo, bibakutshilwe kukumiina. — (2) Sunga'shi: kutuumpa. — (3) Sunga'shi: kwipaana. (4) kwamba'shi: Kipindji kia muwa waye kibamushaadila pano pa nsenga.

bwa kukumbasha kikyebe ki'eshimba dia beena maumbo, mu kipungo kipwe kukila, nkitukumbeene, paapa pabatutambukanga mu lukyebanokyebano, ngabiabi, bunkolwenkolwe, budiafi na kutoma kukilekile na ndangwilo yibi ya mankishi, **4** mwinyi mwabamono bu mwanda wenyi panushanuteembe n'abo dimo mu kaaka kafuutakanyi kamune kalwile, abenukaa mulomo; **5** na'bo abakayimuka kumpala kwa yawa e peepi na kutshibila abatala na bafwe kiimu. **6** Mwanda nyi mbwa biabia bubalungwilwe [mukandu wi buwa] kwi baaba namu bapwe kufwa, bwa'shi beekale batshibilwe kiimu, muyiile bantu, mu mbidi; na'shi beekale na muwa, muyiile Efile Mukulu, mu kikudi.

**7** Anka nfudiilo ya bintu bioso yibefubwiila peepi; biabia yikalayi bediingye, na pasukayi bwa kuteka; **8** anka kumpala kwa bioso, paanwe kwikala na kifulo kii kibobo munkatshi mwenu, mwanda kifulo akibwikila mituuto na mituuto ya milwisho; **9** nwileleene bantu na bakwabo, kushii miunuuno. **10** Mupuunda muntu ooso a kwanudi biadi mutambule<sup>(1)</sup> kia buuntu kia lusa, ekwashe-neyi na'kio kwi'ba na bangi, bu balami be buwa ba buuntu bwilekeenelekeene bw'Efile Mukulu. **11** Su muntu aakula, ebikite bu kwisaamba kw'Efile Mukulu; su muntu

---

(1) Sunga'shi: mbamupe.

## 1 MPETELO 4

akwasha [ku mufubo w'Efile Mukulu], akwashe bu [akwasha] ku bukome butuu-she Efile Mukulu, bwa'shi mu bintu bioso Efile Mukulu atumbishiibwe kukiila kwi Yesu Kidishitu, aye mupwandjikile ntumbo na bukome<sup>(1)</sup> ku nkama na nkama ya bipwa! Amene.

**12** Bakumiinwe, tanumonanga kaalo, aka-teembe munkatshi mwenu bu kintu kyenyi<sup>(2)</sup>, kaaka kafikye panudi bwa kwintoompa, bu kingi kintu kia kukaanya kibenufikila; **13** anka, muyiile bianudi bekumbashe ku makyenga a Kidishitu, sepeelayi, bwa'shi, pa kufumbuka kwa ntumbo, nusepeepele namu'nyi na muloo wi bungi **14** Su anukayibwa pa mwanda w'eshina dia Kidishitu, nwi baasha muloo, mwanda Kikudi kia ntumbo na ki'Efile Mukulu nkishaale panudi<sup>(3)</sup>: [ku lwabo lupese, abamusabuula, anka kwanudi'nwe mmutumbishiibwe]. **15** Anka takukyenganga muntu su ngumune a kwanudi bu ntoomboshi sunga bu ngifi, sunga bu mukitshi a bubu, sunga [bu] atwelakana mu mianda yabeene; **16** anka su [muntu akyengye] bu mwina Kidishitu, tebipushanga buufu, anka atumbishe Efile Mukulu mu dino eshina. **17** Mwanda kipindji [kibalombana] kia kubangila kiimu pa shibo y'Efile Mukulu; anka su

---

(1) Sunga'shi: katshintshi. — (2) Sunga'shi: bu kintu kishakitshikile. —

(3) Sunga'shi: nkinuteentame.

abangila kwibedi kwatudi, a nfudiilo ya baaba bashabakookyela mukandu wi buwa w'Efile Mukulu yanekale naminyi? **18** Na su muntu mululame apashiibwa pa bukopo, a muntu shatshiini Efile Mukulu na mulwishi aka-mwenekyela pekuni?

**19** Biabia namu'nyi baaba abafwambuka muyiile kikyebe k'eshimba di'Efile Mukulu, baalwishe yawa mupangi a kishima anyima yaabo pa kukita kwa bi buwa.

**5** Nansendeela bakulu be munkatshi mwenu, ami mwikale mukulu n'abo na kamonyi ka makyenga a Kidishitu, [ami] mwikale'nyi na kiande kipese ku ntumbo ayikyebe nkafuumbulwa: **2** dishayi lwombe lwa mikooko y'Efile Mukulu lwanudi n'alo, nwelukunkushanga, kushii bu abakitshishwa pa bukopo, anka bu abekitshiina, kushii bu abafubila efuto di buufu, anka n'eshimba dia muloo, **3** kushii bu babikale panundu pa bu-pianyi, anka pa kwikala [bu] bilesheesho<sup>(1)</sup> bia lwombe lwa mikooko; **4** na apakafuumbulwa mulami mukata a mikooko, anukatambula kilongo<sup>(2)</sup> kia ntumbo kishakilwishikaa.

**5** Pamunenka, anwe, basongwalume, nwiysishe kwi bakulu; dingi [anwe] booso, nwikale beyishe muntu na muntu kwi mwinye; mwanda Efile Mukulu mwikutwene

(1) Sunga'shi: bu bipwandjikiisho bia lwombe. — (2) Sunga'shi: kifulu kia bufumu.

## 1 MPETELO 5

na baasha kwitatula, anka apeyaa bantu beeyishe<sup>(1)</sup> buuntu [bwaye]. **6** Biabia eyisheyi muushi mw'eyaasa di bukome di'Efile Mukulu, bwa'shi enukaamishe apakalombana kipindji, **7** nwamutudilanga kiongwa kienu kioso, mwanda'ye kwete kwitulama.

**8** Edingyeyi<sup>(2)</sup>, nupasukye: mulwiishi<sup>(3)</sup> n'enu, diabulu, kwete kwintwifuunya, bu ntambwe akuumbu, akiimbi muntu adia kudya. **9** Mubiandwileeyi, pakwikala bashimate mu lukumiino, bawukye'shi, yaya mpombo yimune yikwete kumwekanga<sup>(4)</sup> mwi bakwenu be pano pa nsenga. **10** Anka Efile Mukulu a buuntu booso, mwinwitanyine ku ntumbo yaaye ya looso mwi Kidishitu Yesu, panukapwa kufwambuka kapindji kapeela, akenwikasha aye nabene bu balombane, akenushimatshisha, akenukankamika, dingi akenwimika pa kibangilo [kishakistanishwa]. **11** Kwadi kwikale [ntumbo] na bukome<sup>(5)</sup>, ku bipwa nkama na nkama! Amene.

**12** Nenufundjila mu katshibo na Silivano<sup>(6)</sup>, mwikale mukwetu a kishima, biangyele meeshi, nenusendeela na kushinkamisha'shi mu bunu [buuntu] mwanudi nyi mbuuntu bw'eyendo bw'Efile Mukulu. **13** Yawa

---

(1) Sunga'shi: baasha kupopeela. Tala mukanda wa miele 3. 34 na wa Shake 4. 6. — (2) Sunga'shi: yikalayi na lubasu. — (3) Sunga'shi: yawa alwiyaa n'enu, mwinushikwe. — (4) Sunga'shi: yikwete kulombananga. — (5) Sunga'shi: katshintshi. — (6) Sunga bu Silasa dingi eshina diaye.

[mukwetu mukashi<sup>(1)</sup>] musangulwe n'eenu pamune ku Babilone enwimuna, na Maako, mwana ande [enwimuna]. **14** Eyimusheneyi ku muntu na muntu na kwififi na kwa kifulo. Kufukama kwikale kwanudi'nwe booso be mwi Kidishitu!

---

(1) Bangi bantu abaaluuula'shi nyi Nkakongye ka ku Babilone akebeemuna.